

續碑傳集



續碑傳集卷八

江陰繆荃孫纂錄

道光朝部院大臣

黃鉞傳

安徽通志

黃鉞字左田當塗人家於蕪湖乾隆庚戌進士授主事籤分戶部時和坤管部務鉞告歸嘉慶四年

仁宗睿皇帝親政以安徽巡撫朱珪薦

召見養心殿

諭曰朕在藩邸卽知汝汝因何告假鉞據實陳奏奉命懋勤殿行走由主事改擢贊善直

南書房未補缺

特旨與考試差嗣是典湖北山東順天鄉試任山西山東學政密摺奏事由贊善洊擢至禮部尚書

賜紫禁城騎馬肩輿入直二十五年放會試正考官榜首陳繼昌以三元及第時稱盛事秋隨扈灤陽

仁宗睿皇帝龍馭上賓

行在喪儀禮部無例案可循皆鉞悉心擬奏

宣宗命加太子少保銜在軍機大臣上行走調戶部尚書鉞敬其所事

實力匡襄京察議敘道光三年

錫宴玉瀾堂繪像鉞爲十五老臣之一

御製詩褒之云豈獨文章禁省冠一德密勿惟幾康四年

仁宗睿皇帝聖德神功碑恭代書成拜蟒服大緞之

賜五年乞休

溫旨慰留六年屢申前請情詞肫切

予告回蕪湖在家支食半俸瀕行暨十八年兩次

恩賞蔭枝

諭曰知卿不假蔭苐之功聊申眷念卿其善自靜攝二十一年卒於蕪湖年九十二初鉞幼喪父母鞠於外家乾隆中以廩貢挑騰錄議敘吏目兩次

召試二等年四十一始爲部員數月卽歸掌教皖南北者十載其後不次超擢屢司文枋蒙

仁宗批諭云汝本寒士因石君薦拔遂至於此能法石召先生人品學

業必能永沐朕恩鉞感激圖報矢勤矢慎  
內廷宣力二十有七年克盡厥職故能渥荷

兩朝恩眷不徒以工書善畫見長嘉慶道光年間兩次

賜第內城三次太醫視疾妻喪軍機章京郎中趙元祿齋

硃諭賜慰切勿過有哀傷七十八十九生日疊蒙

御書福壽扁聯壽佛如意朝珠珍玩文綺用迓福祉又蒙

恩諭伊子禮部小京官黃富民加恩作爲該部主事俾聞之益增慶慰

又前在戶部右侍郎任內以錢局爐頭增復料錢部議降二級奉

旨調任禮部右侍郎明年卽轉補戶部左侍郎後以戶部任內失察假

照降爲三品頂戴明年蒙

賞還一品頂戴皆

異數也遺疏奏聞

宣宗成皇帝悼惜有學問優長持躬端謹密勿宣勤之

諭晉贈太子太保銜入祀賢良祠照尚書例賜卹原任內一切處分悉

予開復

予謚勤敏史館立傳

諭賜祭葬碑文葬當塗南褐山下先是道光辛卯安徽濱臨江淮州縣水災鉞首捐千金助振癸巳復水捐百金助振乙未蕪湖洊饑倡建豐備倉儲穀千石倉旁造鄉塾月課生童鄉人德之及是請入祀當塗蕪湖兩縣鄉賢祠奉

旨允准著有壹齋集四十卷二十四畫品一卷

劉鑲之傳

注封翁

劉鑲之字信芳父堪早卒伯父壻撫教之乾隆五十四年進士改翰林院庶吉士授檢討累遷兵部尚書嘉慶十八年兼順天府府尹林清之變部議以鑲之失察應左遷

上加恩改爲留任是年冬奏請酌改順天府屬各事宜一治中應改爲題缺一府屬各員與直隸各缺通融升調一四路同知所轄千把外委應察明功過賞罰一酌添大興宛平兩縣遞馬及所屬壯丁均下部議行嗣以緝捕逆匪功加太子少保調戶部尚書以大宛二縣所部地界廣長向但設有營弁巡捕請移縣丞駐戈莊資協緝

從之二十二年

秋爾迴鑾奏對失

旨貶秩旋守兵部左侍郎兼刑部左侍郎晉都察院右都御史仍兼府尹二十五年調兵部尚書加太子少保其年九月

今上卽位調吏部尚書充

經筵講官道光元年卒於官鑲之廉正旣卒

上謂其明白敢言深爲悼惜

賜祭葬諡文恭

子告刑部右侍郎秦公遂庵墓志銘

陳用光

道光元年秋七月初十日子告刑部右侍郎秦公遂庵以疾卒於家是年四月廿三日公嘗致書於新城陳用光曰余衰病增劇恐旦暮入地君知我又素知古文敢以他年墓石之文相屬余生平治行子弟無能盡知者當略具梗概屬瓊山張編修岳崧爲行狀以授子余得書爲憮然者累日旣得訃益愴然以悲謂公何相信之深而自知之審也旣見張編修問以行狀則自海外來過惠山未嘗見公未幾公弟永平守沅以書及公子緇武所爲行狀來速余踐前言余雖不能文然辱公知如是其曷敢辭按狀公諱瀛字凌滄一字小峴晚又號遂庵宋龍圖閣直學士少游先生後也學士子湛政和中爲倅於常州因家焉十傳至諱

准慎者始遷於無錫明湖廣巡撫諱耀者公八世祖也入本朝舉康熙己未鴻博歷官至左春坊左諭德諱松齡者公本生高祖也曾祖諱實然祖諱春田父諱鴻鈞三世皆以公官

贈光祿大夫兵部左侍郎妣皆

贈一品夫人公兄弟五人于次爲長也幼有異稟讀書能兼人學爲詩古文輒千言立就外祖徐二磯某及從曾祖文恭公皆器之年十六補縣學生年三十二以貢入京師是年遂舉京兆丙申春

純皇帝巡幸山東公獻賦

行在試以能知題所自出己黜而特爲

純皇帝拔置一等

賜內閣中書未幾入直軍機丁母憂歸旋丁父憂治喪葬一以禮既服闋補中書以京察一等擢內閣侍讀復以京察一等記名以道府用尋遷戶部郎中癸丑出爲溫處兵備道調杭嘉湖兵備道擢浙江按察使調湖南按察使壬戌引疾歸嘉慶九年病痊補廣東按察使擢浙江布政使入

覲乞內用補光祿寺少卿轉太常卿順天府府尹擢刑部侍郎緣事左

遷補光祿寺卿擢左副都御史充會試知貢舉擢總督倉場戶部右侍郎旋奉

命以三品頂戴爲左副都御史擢內閣學士兼禮部侍郎遷兵部右侍郎調刑部右侍郎以目疾乞病歸自是家居者十有一年卒時享年七十九公旣以文名而六應禮部試僥得復失當直

內廷時益訪求

國家掌故爲有用之學性耿直而仁恕勇於任事意所不可雖遇權貴持論不少假借而不爲震厲之色又勤於其職故雖不爲和珅所喜而不能不循資例以簡缺道府薦其特異以繁劇者

純皇帝知公也公之勇於任事在溫處時除永嘉數十年以生監充莊長之弊而民旣免役賦亦無逋擢浙江提刑甯紹台大水歲饑甚有司匿不請振公請於撫軍曰預報收成乃約計通屬爲言今猝有水患正可據實

上聞何忍立視民死力爭得請及調湖南歲又饑長沙衡陽及他縣姦民聚眾奪米者事數起公旣設法禽治其渠魁而不爲株連徧曉諭之民乃定而衡陽大水漂沒人民田廬無算先一年衡州歉收有司匿不

報聞而是時陝西奏撥兵米其派及湖南者衡州與焉公言災傷如是奈何不議振而議餉力請於撫軍得截留他縣兵米而減價平糶民乃定公之急紓民患如是及其讞獄則寬猛相劑而務得其情在溫處時據乾隆初年徐兵備縣永文檄明釀金埋榷爲會之非邪教以釋瑞安民池聖功等之罪而訊得仙居縣道士李鶴皋以無爲教聚徒眾者計禽治之誅渠寇數人而寬其連染者有差提刑浙江促水師提督援定海普陀之盜警撫軍難之而制軍卒用公禦盜策以戢盜治韓球闖阿三之獄皆當其罪提刑廣東禽治亂民梁修平而以功讓制府倭公治吳蝦喜之結黨於順德者撫黎民之爲亂於瓊州者懲賭博之號爲白鵠標者而其在浙江平反定海難民蔡長興十二人之非盜兩上書於撫軍卒得釋及海盜江文五誣其族與某通實則某嘗首文五於縣有縣牘可證撫軍旣以入告而卒能聽公言以釋某尤爲世所難行者爲太常時嘗奏陳廣東事宜謂勦捕海盜之法在討軍實樹聲威戒虛飾而治內地之姦民句連海盜者則嚴防守必先澄吏治澄吏治必先固民心其要則清訟獄抑冗濫懲蠹滑

睿皇帝亟稱善焉故旣調府尹而遂任以司寇之職其在司寇屢有平

反而糧船運丁盜米事發有謂用藥置米中米立溢者公試之不驗以入奏則

容皇帝已手試其藥不驗知其枉因益器公故公雖以事鐫級一歲六遷而仍畀以司寇蓋知公之耿直而仁恕爲能勝祥刑之任也公於詩古文及制舉業皆力追古人風格而能有所自得少時爲齊次風杭堇浦所知旣得舉則見重於寶東皋官京師與王惕甫魯山木先生以文字相質論及見姚姬傳先生而彌有契合焉當官太常時用光嘗質以文公策勵之甚至歲壬申訪公於無錫公來舟中語移晷欲留之遊惠山不果自是雖以書相往復而不及見公矣有自南來者輒問公近狀知公推其孝友嫺睦之意設義田置祭田修家譜而復以其餘修縣志誨誘後進勤懇如不及而每與余書較若其意有不釋然於中者蓋公之所志者大欲以才副其學而嘗患於不得行其意其官中外及家居旣已卓卓有所表見矣而歆然猶以爲合於俗之難而力學古人固未易言也公所著有淮海公年譜六卷已未詞科錄十卷無錫金匱縣志四十卷小峴山人詩文集三十六卷板藏於家公生於乾隆癸丑正月二十八日卒於道光辛巳七月初十日

誥授榮祿大夫兵部左侍郎配朱夫人前卒

贈一品夫人子四人長緇武監生江西候補知縣歷署彭澤峽江樂安  
宜春縣次緇文監生以後其仲叔某皆朱夫人出次緇承殤次緇業幼  
皆側室戴山孫七自緇武出者昌熙昌煦昌烈自緇文出者昌熾昌煌  
昌煜昌焯昌煜府學生其入泮時與公補縣學同歲公所爲賦重遊泮  
宮詩者也曾孫二人若璜若珩某月日葬公於某原銘曰  
錫山之麓淮海裔曰生俊傑昌厥世尚書諭德名相次抱仁趨義富文  
字迴翔禁省歷卿寺中粵越楚勤吏事其學既殫才則試摧剛煦柔播  
威惠扶剔疑似無障翳意所孤行屹不避終達厥誠溥厥利其文龍轡  
才鳳翽

帝惜其歸溫語被一星將終伏衡泌遙慟

鼎湖惟掩涕公懷坦坦性樂易我昔與游數談菰諾公見屬爲公志千  
秋萬世名不替

戶部左侍郎提督江蘇學政周公神道碑銘

魏源

上之是非不明則其公在天下之是非不明上之是非明則其公在上  
公在下則是非與黜陟出於二公在上則匪直出於一旦以黜陟正是

非尤克昭蘇萬物平概羣品

國家承明之敝決塞去壅而

今上六七載各直省若涇縣之獄渭南之獄太原之獄德清之獄匹夫

匹婦猶有不獲其情者輒煩

朝廷重臣親跋涉萬里或內付廷尉而後平反之重蔽牢蒙或卒破壞  
故幽隱畢達而吏不敢以民命草芥其尤甚者湖南湘潭之獄侍郎周  
公以手書爲撫臣訐奏身譴職削吏乘勢益無忌黨并雷同剷根滅跡  
巨姦逸法網良牧絀劾議萬夫吞氣放臣息影惴惴蝸居灰心絕望矣  
而雷霆忽發於

新政之初起廢之詔舊撫之譴與一二嗣治獄之督撫按察相繼盡投  
閒散而復公舊職敷歷中外復爲

天子重臣使獄事虛實曲直出覆盆而照日月者皆出

天明天聰特照獨斷嗚呼豈非公在上而是非出一者與方獄事之起  
始以江西客民之曠橫繼以湖民之報復大吏不善鎮撫以致閉城罷  
市械鬪兼旬人心洶惶幾激大變時值

仁廟六旬萬壽之年撫臣慮干不測初奏至卽諱匿不以實聞而首羅

職在籍石給事中爲鉗塞言路計識者蚤知其無意獄事矣公詢其齋  
奏材官盡得狀知虛實大懸慮釀湖南巨患旣面奏本末有  
救馳詢猶不以撫臣爲不可與言手書忠告撫臣方倉皇於

廷救不德反讐遂一意護前反噬構陷公以是獲

嚴譴然天下亦遂曉其一樸誠一傾險一忠直一罔上詩曰云不可使  
得罪於天子亦云可使怨及朋友古今君臣寮友之際詎不甚難哉以  
公至誠無逆億若是設遇軍國事重且大於此者必不肯隱忍卻顧唯  
歸明矣遇友有賢於舊撫者其必竭誠無不盡明矣被放南歸先後尚  
家樸實之  
與鯁直之

論

仁廟知公不謂不深乃守制起復未幾而被議

今上再起駁駁

器用而遂不祿士功業顯不顯於世固自有命焉於人又何尤公文學  
在士林典刑在鄉邦政績在海內有李君兆洛行狀及江蘇請祠名宦  
公狀在惟湘潭一獄本末則迄今海內傳聞尚有不盡其情者故敬揭

國家所以重民隱決壅蔽使孤立樸誠之士百擠不傾有以作百世臣子之氣者於前而後以公生平他行銘諸後公諱系英字孟才號石芳湖南湘潭縣人乾隆戊申鄉試舉人庚戌進士授翰林院編修歷官詹事府右春坊右贊善司經局洗馬翰林院侍讀侍講學士侍讀學士光祿寺卿內閣學士吏戶兵工四部侍郎兼署禮部右侍郎充

高宗實錄館纂修官

仁宗實錄館總纂官副總裁

咸安宮總裁治河方略館副總裁

文淵閣直閣

日講起居注官

南書房

上書房行走嘉慶戊午庚申順天鄉試壬戌會試同考官福建江南順天鄉試副考官四川山西江西江蘇學政卒道光四年七月三十日生乾隆三十年二月二十五日年六十歲奉

旨祀江蘇名宦祠曾祖某祖某父某妣某以上皆  
贈如例配謝夫人子銘恩副貢生江華縣教諭貽棫監生貽樸廣東鹽

庫大使孫二葬某原銘曰

帝選宿學入侍

講幄公矢其慙匪夕伊朝受知

兩朝若雲在霄曰汝教督於汾於蜀士宵其讀曰汝司衡於南於京士

春其英曰汝貳部司空司馬朕肱且股

天鑒其衷民顙其恫公蹇其躬雖則蹇難

仁廟斯眷溫綸載渙卒俟其定以貽

嗣聖大正厥命臣受於君子受於親惟命之循

實錄手輟中夜感泣曰思

先帝弗懲厥前益矢厥肩揅民恐邇手拮口瘖大災克蘇士氣克桴庶

公其宰以潤四海曷云不待公重如山公粹如璠萬夫之憲公位日崇

公產不充一畝之宮顯顯令哲皤皤黃髮曷云其忽穹碑湘濱公配恪

勤以教事君

戶部左侍郎提督江蘇學政周公神道碑包世臣

公諱系英字孟才號石芳湖南湘潭人曾祖新彩祖昭俊考世宇皆不

仕曾祖妣胡祖妣謝前妣以公貴

封贈如例榮祿公有三子伯系蔚副榜貢生永綬廳學訓導仲系莢早  
世公其季也公生二歲而孤稍長穎慧端重若成人甫弱冠以乾隆戊  
申舉於鄉庚戌登第以疾故癸丑改庶吉士乙卯授編修嘉慶戊午庚  
申皆充順天同考官己未充

實錄館纂修官壬戌充會試同考官其夏擢右贊善充

咸安宮總裁癸亥大考二等遷右中允甲子擢司經局洗馬直

文淵閣事福建副考官乙丑充

日講起居注官其冬授四川學政擢翰林院侍講轉侍讀進侍講學士  
丁卯入都供職戊辰轉侍讀學士充江南副考官己巳以講官扈

蹕

東西兩陵五月

命直南書房九月擢太常寺卿庚午

特旨改

上書房行走充

三阿哥師傅 三阿哥今惇邸出以大雨曠班實鐫

一級仍留直

上書房八月扈

躋熱河左授光祿寺卿旋授山西學政辛未擢大理寺卿癸酉擢內閣學士兼禮部侍郎入都供職復入直甲戌擢兵部右侍郎充

殿試讀卷官兼署工部右侍郎管錢法堂充治河方略館副總裁乙亥四月奉太夫人諱回籍丁丑起復署兵部右侍郎戊寅補吏部右侍郎充順天副考官己卯轉左兼署禮部右侍郎充

殿試讀卷官兼署工部右侍郎九月降編修逾月除名勒回籍庚辰八月

今上登極十月

特召以四品京堂起用辛巳正月至都

特派

實錄館總纂官其冬補翰林院侍讀學士旋擢內閣學士壬午正月授

工部左侍郎充

實錄館副總裁二月授江西學政其秋調任江蘇甲申改戶部左侍郎仍留任是年十一月三十日卒於江蘇學政官署時公正六十也公金聲玉色鬚眉如畫望之若神人故事小翰詹任學政請訓止一面公以洗馬使四川獨